

## Touwtruc

Een weke of drieje leden weren ze op et vliegtuug stapt: Garriet Gaepies van de Haule mit de vrouw.

Veur et eerst van heur leven in een vliegtuug.

Garriet hadde dan ok aorig de kriebels in de boek had, doe ze op Schiphol in die grote zulveren voegel stapt.

“Niet mierken, Garriet,” hadde Bets zegd. “Niet mierken...instappen.”

En doe was Garriet mar instapt...nao een keer of wat diepe aosem te haelen.

Hi'j hadde et ommes beloofd: ze zollen tegere op een twiede huweliks-reise as ze twintig jaor trouwd weren.

De eerste huweliksreise was nog in de tied, dat een daggien Kaele Dunen nog krek zoen betien binnen et budget vul.

Now, een weke of drieje leden was et zoveer, heur twintigste trouwdag.

Dat doe moest Garriet d'r an geloven.

Bets hadde al een maond of wat daorveur een wereldreise boekt.

Een wereldreise nota bene. Een wekien Benidorm was hem al mooi zat west.

Mar goed.

Et was toch ok wel biezunder west tot now toe.

Ze hadden Rio de Janeiro zien, en New York, Caïro en Jerusalem.

Daor weren ze nog bi'j de Klaegmure west.

As of Bets thuus al niet genog klaegde...

En now weren ze in Calcutta ankommen.

Bets, die krek veertig, en dus in de gevaorlike leeftied was, was slim, hiel slim teleursteld in heur tien jaor ooldere Garriet.

Slim teleursteld in wat d'r allemaole gebeurd-of, om nog wat juuster te wezen, wat d'r *niet* gebeurd was-in die eerste drie weken van heur twiede huweliksreise.

D'r was naemelik hielemaole niks gebeurd.

Gien bliksem!

Liggen en slaopen, zo was et!

En now weren ze dan in Calcutta ankommen.

Vroeg in de middag leuten ze zich inschriever in een hotel.

En naodat ze even de waslappe deur de snute trokken hadden, besleuten ze een aentien kuieren te gaon.

Ze wollen zovule meuglik zien in die vierentwintig ure die ze veur Calcutta pland hadden.

Nao een stief ketier kuieren kwamen ze bi'j een bazaar, zoen markt.

En daor zagen ze een Hindoe-fakir, die de beroemde Indische touwtruc uitvoerde.

Mar et was niet die spectaculaire truc, waarbi'j een joongien et touw inklimt, heur.

Et was een wat ienvooldiger uitvoering.

De fakir zat op de groond en veur hem, op 'e straote, lag een opruuld aende touw. De fakir speulde an ien stok ien of aander melodiegien op zien fluite.

En wiels hi'j speulde begon et touw langsem an omhogens te gaon en bleef uutaenlik stief rechtop staon.

Bi'j et zien van disse veurstelling kwam Bets Gaepies op een schitterend idee. Mar ze zee d'r niks van tegen Garriet.

Saemen mit heur Garriet gong ze weeromme naor et hotel veur et diner. Nao et eten waachtte Bets totdat Garriet, zoas gewoonlik, om negen ure naor bedde gong.

Doe sleup ze stillegies de kaemer uut en verleut et hotel.

Ze zocht een taxi en een tolk en gong naor de bazaar en vun zowaor de fakir weeromme!

Mit hulpe van de tolk kreeg ze et veur mekeer om de fakir zien fluite te kopen en ze gaf 'm centen om heur dat biezundere deunten te leren speulen.

Dat deuntien dat et touw zo stief rechtop had doen staon.

Doe stapte ze weer in de taxi en gong rap naor et hotel weeromme.

Garriet lag, zoas gewoonlik, te snorken as een osse.

Staonde naost et bedde begon Bets zachies op de fluite te speulen.

Ze bleef mar speulen en speulen. En wiels zij dat deed, begon et laeken over heur slaopende Garriet geleidelik an omhogens te kommen.

Doe et naor Bets heur zin genug hoogte beriekt hadde, gooide zij mit een wilde blik in de ogen de fluite an de kaant en trok mit een bliede kreet et laeken vot.

En daor ston... stief rechtop...et elestiek van zien pyjama!